



Carmelia Hendry-Monn

naschida ils 4 da schaner 1925,
morta ils 19 da zercladur 2005

La tatta Carmelia ei stada la feglia da Vigeli e Barla Monn-Berther. Sia mumma miera da quella pigliola mo paucs dis suenter. Quei ei stau ina greva frida pil bab ch'ei staus anavos cun otg affons. L'affonza ha la buobetta Carmelia passentau tochen ir a scola tier siu aug Placi e l'onda Meia. Suenter ils onns da scola ha

ella luvrau in temps en in hotel, a Brunnen. Cu la secunda uiara mundiala ei rutta ora, eis ella turnada e restada per adina ella val. Igl onn 1948 eis ella sospesada cun Luis Hendry da Surrein. Plascher e satisfacziun porta la naschientscha da siu fegl Sepp e da sia feglia Rita. Sper la lavur dil puresser ha la tatta dau suttetg a luvrers che luvravan a Nalps e pli tard ha ella offeriu a numerus hosps da vacanzas sia stupenta habitaziun. Insumma, la tatta era in tip practic cun in bien maun ed inschign, saveva cuser e cuntschar diltut, far caltschiel e zambergiar aparti bein. Cun gronda fantasia ha ella fatg enqual costum da tscheiver per ils ses. Ella ei stada ina durina plein forza ed energia e vegnida malsauna pér avon biebein dus onns. Igl avrel digl onn vargau ha ina malsogna maligna sfurzau ella da seremetter e serender en Casa da tgira Sursasialla a Mustér. Leu selegrava ella adina puspei dallas visetas ed era detg cuntenta.

La novitad dalla mort da nossa tatta ha contonschiu mei duront nies viadi da nozzas ad Alaska. Schebein ch'ins saveva che la tatta seigi maldisposta eis ei stau grev da buca saver prender cumiau sin fossa. Cun la suandonta brev alla tatta hael anflau ina via da dir adia.

Cara Tatta, tresta e cun petras larmas prendel cumiau da tei. Ussa eis ti leu, tiel Segner. Tier il qual ti has adina giu gronda fidonza e cardientscha. Bia bialas regurdiantschas van a mi tras il tgau. Duront tut quellas uras e dis che jeu hael astgau passentar cun tei vi Surrein. Quels gronds dis cu las tschuttas mavan ni vegnevan dad alp. Quei zeterio tochen che ti vevas pinau tut. Surtut tias empau complicadas gliestas da numras che constavan la finala tuttina. Ils dis da far fein, cu ti pinavas las marendas el canaster ed il caffè ella honta zugliada en gasettas ella tescha brina. Il te da far fein cun la scadiola d'aluminium cun manetscha cotschna. Il te bia memia dultschs, mo buns. Senza schar sprizzar en bravamein cun «kik» e prender in «kaugum-

mi» astgavan buca ira a far fein. Cu nus stevan tier tei surnotg seschluitavel tier tei enta letg cul tat era gia levaus. E lu schevan nus ensemens in rusari. Mintgaga cu ti devas il tgau vevel jeu da far ir la rucla dil paternies tras tia detta. E la sera tscheina giavischavel buglia da semel cun bia sirup. Bia uras essan nus stadas ensemens e bia haniel saviu emprender da tei. Cun tia ferma cardientscha e fidonza en Diu has ti bia ga consolau e detg: «el Segner gida schon, té stos mo di enqual peternies epi gide nies Segner!». Tut quels Nadals che vus vegnevas enta Rueras a festivar. Ils gentars las dumengias, e lu in scart troccas suenter miezdi. Paupra, sche ti e mumma pigliavas en il rir. Pervia d'ina legra historia da pli baul. Lu cuzzava ei in mument tochen che ti vevas puspei naven las larmas dil rir e devas vinavon troccas. Cun tiu bien humor has ti adina puspei fatg rir ils tes. Ti eis stada a mi in bien exempl. Has adina mirau dil tat e da tes affons e beadis. E quei en temps, dils quals nus giuvens gnanc savein s'imaginar. Cun bia carezia, lavur e cardientscha has ti manischau quei. Jeu sperel che era jeu sappi esser aschi ina buna dunna e mumma. Cara tatta, ti mauncas. Tiu: «vages quitau bueba!», tiu: «vo segir bueba!», tiu: «turna puspe bueba!», tut quei maunca. Mo, cara tatta cun tiu agid vi jeu suandar tes plaids, dar quitau ed ira segir.